



崑山雜詠卷第十五

宴集

顧玉山金粟塚秋宴集


顧仲瑛墓在界溪西北後卒于鳳陽

歸葬于此

殷奎

艱時阻良覲故人成遠別始登金粟塚仰見端
正月舊遊獨徘徊桂枝重攀折玉杯承夕露翠
竹落蒼雪賓筵列才彥末至慙猶劣賦詩詎云
工庶以慰契濶

和顧仲瑛金粟塚秋夜宴集



謝應芳

我昔過北邙立馬山之隈爲問隴頭樹皆云後
人栽生前尊酒誰不有無人到此自對青山開
屋堆黃金五侯貴難免白骨生蒼苔道傍多棄
夜光璧爨下誰惜絲桐材玉山先生達觀者胸
次不着閒悲哀清秋攜客墳上飲麴車載酒山
童推大咲胥魂乘白馬深慚鯨魄化黃能墓銘
自製詩自挽視身不翅輕于埃鶴群長繞嘉樹
舞龜趺並載穹碑來鸞翔鳳翥玉箸篆虎踞龍
蟠金粟堆長吟復短吟此興何悠哉秋風無情

摧萬物芙蓉亦老臙脂腮咲言他年翁仲並寂
寞何如此時賓客相追陪功名本愁根富貴真
禍胎百年能幾日一日能幾杯從茲秉燭長夜
飲猶恐四蛇二鼠忙相催主人沉醉客亦醉絕
倒不顧傍人咤北望中州數千里人家盡作兵
前灰髑髏委荒郊孰辨賢與才伯夷空忍首陽
餓屈原徒作湘江纍神僊初無不死藥方士浪
說尋蓬萊君不見無邊之海白淼淼無名之山
青巍巍長鯨噓吸成風雷徐市一去何曾迴
宴顧仲瑛西郊直堂分韻得翠字

廬熊

西山帶郊居良辰奉嘉會江調采芳蓮天香抱
叢桂泠泠朱弦瑟珊珊文玉珮傳柘洽情素秉
燭映眉翠好樂諒無荒會合豈云易追想翠池
遊流月炫華轡

九日宴崑山強氏樓夜雨曉晴風日清麗

賦此以紀良會

酒滿壺觴日滿樓登臨尚想舊風流雨驚昨夜
三更夢晴散今朝九日愁山色最能青我眼年
華何故白人頭萬金難買風光好那惜新詩報

荅秋

城南草堂與顧仲瑛夜話

郭翼

花發草堂風雨春青鐙剪韭話情親亂離隔世
今何夕生死論交竟幾人城郭是非華表鶴蓬
萊清淺海中塵三千賓客馮驩在莫恠傷歌撫
劍頻

宴呂敬夫水閣

暮春三月之佳日畫裏看花水閣杯一覆皓鶴
巡池步百葉緋桃映綬開卷幔不知雲亂入題

詩應恠雨相催武陵何處能忘世莫遣聞人取
次來

野航軒雅集

今日有佳集野航俯清婁酒從碧筒瀉煙向博
山浮長林樹陰密方池水氣秋蟬依叢葉語魚
唼落花遊睽離獲良覲飛光爲遲留

次韻王叔正陪李廷璧郭希仲至玉山同

集草堂

亂離又見臘嘉平訪舊仍同上番行報恩終慚
結襪子出關應慕棄繻生江濤水發船如馬雪

浦春回柳似城懷人索句草堂裏南望孤雲多
遠情

芝雲堂嘉宴

于立

九日肅霜秋杲杲置酒高堂對晴昊阿咸聯翩
有冠蓋滿堂賓客皆傾倒我昔勾吳爲客初兩
家兄弟知名早頗學操觚弄辭翰伯氏差長仲
氏好于今俯仰二十年爾正崢嶸我衰老伯也
爲官能殺賊拔刀攬轡無難色今年部糧入城
去走馬歸來江上宅仲也承家有門蔭三年去

作燕都客一朝赤紱照金符萬里鯨波浮大舶
叔氏有言咸爾聽蒞事事君思且敬男兒濟遇
自有時爵位崇卑非所病况茲曆運濟昌期宰
相良明 天子聖稍待風塵靜四方看汝飛騰
霜翮勁即今座客皆賢才商彝周鼎聯瓊瑰豈
無詩章壓鮑謝亦有賦頌誇鄒枚吳姬清歌趙
姬舞鳳笙鸞管聲相催古人賢達盡黃土嗟我
不樂胡爲哉主人勸客客復說請君試看天邊
月此夕清輝滿意圓明夜孤光還漸缺世間萬
事豈有常人生會少多離別人人生會少多離別

但願無事長懽悅

岳榆

玉山九月霜未寒珊瑚碧樹青琅玕紅蠟光搖
絳綃幕銅龍露滴真珠盤高堂置酒宴賓客侃
侃子弟咸衣冠有仲字淵伯字翼起舞爲壽承
君歡伯也執轡力如虎去年斫賊婁江干仲也
歸來有父蔭萬里漕粟輕波瀾赤符碧盃相照
映青絲紫馬雙金鞍舉觴逡巡次第起翠香暖
影紅團藥座中賓客誰最舊舊者在前新者後
咲譚氣岸干斗牛揮毫落紙龍蛇走森森子弟

盡賢才大貝南金輝瓊玖紫檀之槽玉奴手雲
和妙曲瓊英口人生如此樂無有主人勸客客
長壽主人亦盡杯中酒歲歲年年康且壽

秦約

禹貢揚州域吳藩滄海邊舟車通貨殖生齒匝
廬塵王化由來被文風久已宣衣冠誇巨族人
物尚名賢雨露栽培厚乾坤覆燾全流芳何袞
袞積慶正淵淵丞相勲庸著叅軍學術專蟬聯
知赫若玉立駭森然芝箭翹葩麗琅玕擢秀鮮
高堂雲翼宇闕閤日忘年邃道凌垠 雕楹帶

蔓延木葉開步障園菊散連錢燕坐神超俗端
居思欲僊縣籤書萬卷曳履客三千翁媪頽顏
好兒孫綠髮妍鵲鶴昆弟念瓜瓞本支綿陳紀
星猶聚姜肱被共眠承家儀範在具慶畫圖傳
從子尤才俊能官孰比肩武功行論賞漕輓看
騰騫燕饗來瓊佩公歸列玳筵瑟笙調靜好几
杖恰安便登俎陳熊腊堆盤斫鱠鱸貂裘明雪
積寶玦粲星躔新渥膺殊錫重門擁曲旃繡圍
花作陣縹色酒如川鍾愛推符朗憐才表謝玄
鞬鷹金絡索罄馬錦鞍韉絳節神州遠丹心魏

闕懸恩榮絳組重補報鼎彝鑄愛爾輞川墅慚
余杜曲田高情深繾綣嘉讌浹周旋載詠賓筵
什仍歌行葦篇威儀申抑抑告誡復惓惓宗部
勞謙吉鄉閭揖讓先奮飛思感激容易念迴遭
貌虎方成穴鸞凰不受鞭虹光騰碧宇玉氣燭
蒼煙把炬酣清夜摘辭絢綵牋座稱居士帶門
泊孝廉船懶性從迂拙微生果棄捐遺才宜慎
簡聘帛會聯翩種種頭顱白堂堂歲月遷遭時
未遲暮撫景且留連憂國孤忠炯懷人百慮牽
棟梁收杞梓埏埴貴陶甄敢倚文如海寧論筆

似椽要當除宿莽還儼采芳荃岸幘瞻湘漢褰
衣想冀燕茲晨紀良會剩語爲冥詮

顧瑛

是日秦淮海泛舟過淖湖向夕未歸
余與桂天香坐芝雲堂以佇之堂陰
枇杷始華爛熳如雪迺移席樹底據
盤石相與奕棋遂勝其紫絲囊而罷
於是小蟠桃執文犀觥起賀金縷衣
軋鳳頭琴余亦擘古阮唯撮子雖切酒
甚歡而天香鬱鬱有潛然之態俄而

淮海歸且示以舟中所詠余用韻以
紀迺事云

王子岡頭秋杳冥石牀摘阮素琴停枇杷花開
如雪白楊柳葉落帶煙青每聞投壺咲玉女不
堪鼓瑟怨湘靈酒闌秉燭坐深夜細雨小寒生
翠屏

梅雪齋雅集分題得酒香

張雨

醲郁芬香味更嚴甕間飄滿讀書簾絕勝金鴨
薰花氣錯認山蜂釀蜜甜三嗅麝令消渴止一

中定掃宿醒淹醉翁鼻觀還親切不待狂僧寫
布帘

綠陰亭爲顧晉道賦時姚子章于彥成飲
亭上

袁華

綠陰亭上夏五月瀛洲上客與俱來日出衆鳥
繞屋語竹深好花當戶開鏡裏水涵萍似粟席
間雲落酒如苔更貪賀監清狂甚艇子朝來暮
暮來

李五峯伯雨庶夫希仲夜集來鶴亭

雜詩十五
飛瓊
商爵古駟虞雪操舜琴清箴闔座暖春屏錦舞
劔星流壁月城客散瑤臺風露冷夢中時見許
飛瓊

崑山雜詠卷第十五

崑山雜詠卷第十六

贈寄

贈從兄車騎一首

從兄陸士光

陸機

機字士衡身長七尺其聲如鐘少

有異才文章弘麗俊逸冠絕當世
吳滅後與弟雲俱入洛造張華華素
重其名薦之楊駿辟為祭酒累遷太
子洗馬後成都王穎假機後將軍河
北都督討長沙王又為人所敗又為
宦人孟玖所譖穎以機有異志遂遇
害弟雲眈并被收夷三族天下莫不
悲之

孤獸思故藪離鳥悲舊林翩翩遊宦子辛苦誰
為心髣髴谷水陽婉孌崑山陰

吳地記海鹽縣
東北二百里有

長谷昔陸遜陸凱居此谷東二十里有崑山谷
祖葬焉唐天寶十年太守趙居貞奏割崑山嘉
興海鹽地置華亭縣今崑山屬華亭
祭魄懷茲土精爽若飛沉寤
寐靡安豫願言思所欽感彼歸塗難使我怨慕
深安得忘歸草言樹背與衿斯言豈虛作思鳥
有悲音

歌贈葉季質

陳長方

長方字齊之號唯室其先長樂人徙吳江父侁擢進士第與魏

了翁尤定夫善精身心之學齊之亦道學之士研窮經史有詩集名萬里客談漢唐論

葉子哦詩風雨寒時時和墨搖筆端江山萬里

入寸紙杳靄孤鴻殘照間滄洲散髮徑欲往已
覺置我江之干一身公麼僅如許曾次奈君湖
海寬酒狂稍稍芒角露掃出恠石蒼松盤他人
崎嶇作能事君獨笑談聊一戲青鞋布襪自尋
山四十無家疑度世莫歌長鋏歸來乎不須苦
吟頻撚鬚但將美酒澆魂磊里社年豐皆可酌
醉來橫眠醒讀書長康非癡君豈愚身閑無事
肯過我更作天姥當庭除

五言戲贈呂神童行

嚴煥

煥字子文有神童稱紹興中舉進士

自我誣人物天涯實眇然晚觀童子意早拍病
夫肩凜凜神鋒異琅琅腹笥傳晴温武林道光
恠呂家船

鄉人呂正之教三子連中童子科盛哉前

此無有也推原所以啓其意者由今大

漕顯謨公乃不遠數百里來致感激余

與之釀酒道舊驩甚匆匆欲歸賦詩以

留之長伯奮次仲堪叔獻伯奮淳熙十
一年進士又登衛涇榜進士叔獻

嘉定四年登趙
建大榜進士

千秋萬歲聖賢話盡掛諸郎齒頰間發縱指南

知有自昂霄聳壑定非艱靈椿挺挺元未老珠
樹縱縱孰可攀過我朝陽語衷曲且停煙權置
家山

崑山呂正之三男子連中神童科盖竒事

也建康嚴別駕爲之賦詩某因次其韻

趙彥端

疇昔從公杖屨閑風乎嬉舞水雲間千言自我
一聞悟十駕從渠九折艱早歲道山應徧住他
年盡戟許誰攀何詞可贈張童子莫忘揚公陽
翟山

次韻

葉衡

衡字夢錫嘗為常州守時大水發倉廩賑贍饑民又大疫衡復單騎

命醫藥徧省所疫苦活者甚眾

三秀標姿穎不凡姓名聯列紫微間
已知鳳穴梧棲穩誰謂鵬程雲路艱
孔釋當年親抱送由莊逸駕定追攀
發揮更有文章伯高壓淮南大小山

某屬聞少伊廣文歸別墅將掛其冠然乎
富貴恐不免耳欲謁未能因成古詩奉
迓某無策可去斷章不忘健羨也

葉子強

明光宮高麗鳩鵲三聲朝鷄報宮鑰
車如流水馬如龍門外斗量無處著
歸來日晏僕亦痛毫芒飽暖歸妻孥
豈無道德絢爛者意作霖雨言為謨
何人着眼高蓬華疆仕之年髮如漆
便抽手版掛衣冠把住窮愁甘似蜜
人言進退誠兩塗退者真智進者愚
要當程力之所底未省逸路排輕車
馬侯制行如珪璧五色文章發金石
不知持此將安之天下寶當天下惜
秋郊涼入菰蒲間新詩落筆不作難
應憐俗駕難回者更

費移文過北山

贈慧聚僧良玉

良玉字蘊之行甚高旁覽經傳工書善琴碁嘗游京師聖俞見而奇之以名聞於朝賜紫衣比歸復賦此送之

梅堯臣

堯臣字聖俞

來衣茶褐袍歸變堪色服扁舟洞庭去落日松江宿水煙晦琴徽山月上巖屋野童遙相迎風葉鳴橡櫺

自崑山從學於金陵以詩贄見王荆公

郊亶

亶字正夫太倉人嘉祐中舉進士授睦州推官未赴為書陳蘇州水利王安石善之授司農丞治兩浙水利民不為便免歸治所居大洄瀆水

十里松陰蔣子山暮煙收盡梵宮寬夜深更向

田如井田法歲穫甚厚圖狀以獻復召為司農丞累遷比部郎中

紫微宿坐久始知九骨寒一派石泉流沆瀣數

庭霜竹顛琅玕大鵬况有搏風便還許鷦鷯附

羽翰

贈邈上人

姚舜明

舜明字廷輝嵯縣人宣和初為崑山令後遷御史偽楚時抗節不屈官至戶部侍郎卒贈太師

僧臈俗年俱老大儒書佛教舊精勤姑蘇十萬

披緇客四事無如彼上人

和孫大夫贈開江沈察判

崑山舊置開江營有兵士二百五十人今全吳驛乃故基

冲邈

松陵江色數年餘妙手唯君可决除四郡樂輸
編户力九重恩賑太倉儲劭農盡善無凶滂逃
籍皆歸葺舊居已簡上心千古利何須求薦孔
融書

示郭仲達

葉時亨

時亨字季質一字時質崑山人軋道初舉特科進士

振髮從遊成潦倒拍肩話舊嘆蹉跎年來對酒

詩狂減老去傷時愁緒多顧我曳裾今尚爾念
君求祿竟如何不應例合俱窮躋造化兒癡故
作魔

男子升沉雖係天風花高下亦俄然功名未老
終歸手富貴須時小着鞭落魄羈懷長道路蒼
茫客面染風煙張儀此舌欣無恙談笑封侯會
有年

去夏邦衡胡侍郎生日嘗因茶詩致善頌

其語果驗再賦一篇為大用長生之祝

且求賜茗作潤筆

按益公集公自注庚寅六月崑山發公蓋

王侍御葆之壻也故因錄之

周必大

壽杯又是酌流霞醉眼還醒講殿茶舉世氓謠
思舊德隔年詩識託新芽漢帷果慶登三傑胡
幕何愁不一家賜也多言如屢中合分龍井示
旌嘉

太倉隆福寺創觀音院以詩百韻寄觀大

師且呈鄉中諸親舊

按寺梁天監四年建名報恩院唐天

祐中重建宋祥符元年改今額疑正夫詩即此時作元末復廢洪武十三年以舊基為鎮海衛十四年邑人孫徹捨宅為寺移額于此

郊亶

珍重妙觀師書來再三讀不蒙促歸計迺憂曠

牋牘疑師未相知待我尚塵俗竊聞

廟諱新殿東

畔建廊屋聖像已完布舍利應祈祝其餘雖未

備想亦漸周足凡事在臻牢

廟諱

勿尚遄速堂基

不厭高礫窠須剩築間架莫求大却須擇良木

椽楠貴稠直榱栱要

廟諱

篤但得規模成不憂無

人續五年縱未就十年亦未感今生不能了後

世亦修復中庭要寬廣從舍須團簇堂前種杉

檜方丈植慈竹冬青遶周遭夏初香馥郁松篁

又次之瀟灑快胸腹園中開數徑晚步散蹉跎
沿堦種藥苗乘間採盈掬川芎并地黄幽蘭間
甘菊泡水須麥門熬湯要鷲粟蕞莪并枸杞可
以備蔬簌葵藿及雞冠可以悅心目橘柚耀金
苞鎗旗資茗粥四時皆要用一奴長灌沃地形
或褊隘後墻可展撲東榮有園地幽小類碁局
長土可裁削凡材宜斬斲使之稍清曠可以蠲
煩溽秋至芙蓉紅春來鴨頭綠撥刺有魴鯉優
游棲雁鶩菱芡交加生藻荇參差畜採嚼齒牙
香牽挽襟裙綠可以娛賓朋可以施水陸穿渠

遶吾院高下相聯屬畎引發新聲潺湲若山谷
細事宜先治大道在勤督晨經勸群庶夜講誨
幽獨午間畧行道睡魔可降伏智燈照昏迷慧
刀破貪慾若夫潤澤事在師更崇肅爲山貴覆
簣彈冠重初沐葷羶勿放入酒會當遠逐諸宅
或相混此詩可約束庶令百里人外悅更心服
從善若轉圜慕義如湊輻悟者味醍醐昧者隔
紗縠病者解顛倒強者銷忿毒昆蟲與草芥一
一霑慧福顧此區區心提孩已懷蓄十三聽先
訓觀音爲眷屬二十學於寺有意重蓋覆誦書

小松下夜驚老僧宿老僧睡不穩冥心生毀讞
夢一白衣人戒言勿輕觸凌晨來謝我道此頗
慚慙因知此大緣聖心已潛囑故余昔欲仕先
此治軒塾無端赴辟書萬里走炎燠因緣論時
事乍榮復深辱連延未能歸非敢戀方穀上欲
榮二親次欲庇諸族妻封子可任行將謝微祿
屯遭累見迫神靈若相促前日除永寧君恩殊
委曲風物似京華民醇無犴獄月給五十千歲
租三百斛茲事爲未了力辭求倅睦尚念雖近
鄉官身甚羈拳黽勉終此任庶幾堪退縮驅馳

六十年今朝方自贖可爲林下游放曠比麋鹿
幽園翔書館諸子弄黃軸靜室藝名香與師評
梵僧必欽嚮師應勤訓育童蒙儻來叩我
亦當善告四季飯鄉人三冬辦民浴老姑與老
姊就可報恩鞠季弟與羣姪日可講謹穆人生
能幾何此樂難書錄惟師本英豪少小已良淑
傳經建精藍飯衆邁高躅飄然西北來聲華滿
京輅名山及鉅院諸公意勤縉師皆力辭避許
我歸林麓茲惟吾二人密約有昔夙然能蹈此
語沙金石中玉吾身方困躓師譽正彪裸吾歸

不爲艱師退良難卜飛雲謾出山至寶欣還賈
素志幸已酬忘言目相矚幽顯若相佑成就在
忽倏内外期兩立緇素更純熟惟吾二人者可
以共葺六松江多波濤西山鳴橡榭台嶺誇石
梁廬阜詫飛瀑與師結真賞輕舉效鴻鵠相將
老此身嘯歌隨寢餽數終或歸去任緣順所欲
却觀今日事猶如夢中燭廟諱本依宋板今考
諱字當讀構慎敦三
字

崑山雜詠卷第十六

崑山雜詠卷第十七

贈寄

贈張士行

號雲門
寓崑山

倪瓚

雲門有逸客非仕亦非隱玉井千丈泉此士難
汲引結交雲林叟不顧俗嘲哂我拙惟任真子
德常戒謹相知既有素力學仰顏閔久別見顏
色英姿固天稟欲踈不能忘欲褻不可近

楊提學過千墩寓舍出示吳淞道中所作
余次韻酬之

謝應芳

酒濕宮袍逸興多馮夷擊鼓舞蛟鼉一江星月
光搖動八極風雲氣盪摩不學山陰回雪棹肯
來林下訪煙蘿陽春白雪知音少爲我臨風一
再歌

贈醫一首 并序

呂誠

崑之良醫曰某自號武陵業累世矣
人有疾痛必走先生治無不愈也余
亦間以衰劣資其藥餌之功焉先生

赴人之急也不憚跋涉之勞人之求
藥也自無有貴賤之別其執藝之精
而負嘉名也不虛矣姑誦所聞謾爲
古詩二十韻匪以爲報焉

武陵先生有奇骨何年得此活人術昔聞夢入
閨風顛醉蹋青天霞五色僊人手掉芙蓉旗對
面青囊咲相擲囊中白日生光景雲篆飄飄皆
鳥迹應知此物神所秘區區秦火奚能厄斡旋
氣運保太和下拯黔黎迺其職酒酣渴飲上池
流半生不平俱蕩滌歸來高卧玉山左姓名頗

為時人識白雲雞犬日相聞市壺那與塵世隔
碧桃紅杏自成蹊赤箭青芝翠如織蟲蛭不損
一念仁陰功早已標僊籍嗟余足迹半九州因
癡有愛雪滿頭扶衰每獲金石劑是身是病日
以瘳木桃媿無瓊玖報玉環自乏巾箱酬先生
高致人所慕守價不二儼伯休宋清遠德今復
見作傳恨無柳柳州

贈朱君璧

馮子振

五茸三泖之邦人物皆有澄秀氣象

崑山州能為丹繪於翎毛窠石僧佛
方僊士女有朱君璧者特標致整密
彷彿前古作者風韻不滯於蹇淺不
枵於浮豔余於是喜而拈出之使此
聲流行天壤間當有達官貴人之賞
識進之秘書之直則黼皇猷而飾國
媿將無所不可仍贈以詩

盧楞伽作阿羅漢吳道玄拈自在觀筆墨分毫
無俗氣至今名世與人看

昨日幅騰南海岸真珠纓絡六銖衣補陀岳下

慈悲相劫劫塵塵最上機

苔梅一枝賦詩四韻奉寄顧玉山

良琦

折得南枝古澗旁
千年風骨老風霜
珊瑚出海鹽花濕
鐵柱含波石髮香
可獨詩情東閣在
也知春夢霸陵長
所思何許遙相慰
憑仗山人寄草堂

寄盧伯融

袁華

浮家南北久離羣
知爾移家向海濱
白首一經

能教子黃茅千頃比
封君異鄉花鳥皆春思
故國關山半夕曛
何日酒船還舊里
青山對榻坐觀雲

寄郭義仲

并引

楊維禎

東崑詩人郭義仲有古樂府才余入
吳未識而仲屢寫所製來蓋喜余之
知而余亦喜得仲也因袁子英歸崑
賦詩寄之

芙蓉葉上題霜後何處修辭五鳳樓見說東崑

生郭仲有如小杜在揚州大章皎皎精衛憤小
章嚙嚙柳枝愁夜來青檝發短燭滿地虎睛光
欲流

憶西隱登臨之勝寄訢仲言上人

盧熊

登臨西隱勝杖屨覓幽期木末開虛閣泉原匯
小池琴鳴魚在藻苔破笋穿籬憶子棲禪暇高
懷獨賦詩

寄顧仲瑛

倪瓚

江海秋風日夜涼蟲鳴絡緯尚練裳民生惴惴
瘡痍甚旅泛依依道路長衰柳半歌湖水碧濁
醪猶趁菊花黃知君習靜觀諸妄林下清齋理
藥囊

寄馬敬常

郭翼

奈爾相如好賦何老懷猶得慰蹉跎五侯冠蓋
殊皆貴百世文章自不磨沙漠黃雲龍去遠江
湖秋水鴈飛多旌旄海上重開府還擬扁舟雪
夜過

寄瞿惠夫博士

醉眠亭上追遊日爲惜高情對物華草港鬪飛
花鴨雨竹沙深映白鷗罝叢叢山影侵雲直一
一人家落路斜近報風流多著作門生若箇是
侯芭

荷亭晚坐寄悅堂長老

海上無家來避寇行吟何處可消憂看荷偶到
東林寺落日渾如丈八溝雲葉層陰青過岸草
堂五月澹於秋老子情深能愛客更擬花開一
醉留

崑山即事寄友人

人家繞郭連鳧鴈井落荒涼接野垆湔瀆雨來
秋水暗馬鞍雲盡暮峯青宿草屢過劉過墓紫
藤長倚范公亭結鄰最晚還相並海上長嗟處
士星

初到崑山縣庠寄金德璉秀才

陳則

常分君榻話中宵今日俄成百里遙兩處相思
同落日一程歸夢逐回潮雪晴未與梅花斷春
意先教柳色饒自忝不才何補教卻來清廟得

聞韶

寄公武盧舍人

謝應芳

投老鶴溪垂釣緡遙憐鳳沼掌絲綸
朝會早墨雲染翰詞頭新石麟自是天上物
金薤散作人間春尚須鼓吹振六籍蹴踏班馬追
楊荀

寄東玉山避兵從釋于白雲寺

釋來復

雲霞剪就衲衣輕曾喜逃禪早避兵
賈島未忘

林下約湯休豈戀世間名石牀花雨經函秘
水殿荷風梵唄清應共龍門采樵者詩筒來往寄
閒情

寄徑山顏悅堂長老

室曰城南小隱

時顏悅堂長老退居崑山州城之南扁其

謝應芳

每憶城南隱者家崑山石火徑山茶逢人與說
無生話塵拂拈來帶雨華

暮歸有感寫寄玉山

鄭元祐

山人常年遇有秋尚爾不免饑寒憂左腕難臨
乞米帖中腸只憶監河侯倉塵能飫李斯鼠醉
態且儻檀卿猴瓶儲有粟可飽我起踏北戶看
星流

寄于彥成兼柬玉山

郭翼

匡廬道士三尺強手援北斗酌霞漿露氣朝開
瑪瑙甕丹光夜落芙蓉牀崆峒僊人廣成子鑑
湖狂客賀知章主人種梅已成屋憶爾看雲眠
草堂

奉同鐵崖賦寄玉山

李廷臣

玉山溪路接僊源漁郎繫船老樹根望海樓臺
浮遠市開門湖水落清尊珠光弄月寒丹室石
氣酣雲暖藥園聞說鐵僊曾此宿吹簫清夜洞
庭翻

崑山雜詠卷第十七

崑山雜詠卷第十八

懷思

縣齋懷京師

張方平

東南古縣介江臯西北神州倚斗杓
安得葉君傳秘術時飛雙鳥詣臺朝

次韻顧玉山感懷

袁華

金粟老禿翁喪女及二婦情鍾正我輩
况爾中年後值茲世濁惡喧呶互紛揉
達觀了死生放

浪無何有汎濫經律論一室僅如斗蒲團竹匡
牀趺坐閣雙肘心若大員鏡觸處靡不受榮辱
既俱忘恒歎烹走狗獨憐孫與甥哀哀失慈母
誰能斷嗔愛毘耶有無垢所談不二法究竟唯
濡首宿業想未償驚心血屢嘔深秋天色暄桑
柘葉黝黝念子築杭城土石躬自負城高石易
窮鞭箠無所取書來知近况鰲面龜兩手新穀
幸登場日夜探杵臼悉供役夫養老稚曷糊口
安得海宇清關塞忘戰守歸耕對男女畜雞養
肥牡側聞王師出鐵馬渡沙久中軍霍嫖姚報

國忠肝剖鼓行探虎穴若拉枯與朽捷書尚未
至西風又衰柳思之轉鬱陶澆愁惟有酒興亡
信有數蛇斷秦鹿走荷鋪死便埋四郊多培塿

崑山寒食日有感

馬鞍山城寒食節花氣薰人南陌頭風亂紙錢
飛蛺蝶煙開林響鬧鈎輦半山橋覓誰家醉疊
浪軒非曩日遊面上五年塵與土不堪此地一
登樓

有懷來鶴亭

呂誠

憶昔題詩來鶴亭修篁欲染客衣青飛花造次
沾歌扇舞鶴流連繞石屏正擬劉伶爲酒頌莫
教陸羽煮茶經故人多在青山上獨恠江湖老
客星

憶大泗灤故園

嘗新
米

易恒

卜築長洲外空懷泗灤賓喪家思老僕習俗問
比隣感舊悲時事嘗新慰食貧素餐知忝竊不
是力田人

風雨憶灤中故園

故園十畝瞰林塘花竹陰陰覆小堂好友肯來
唯一二老夫不出是尋常白魚寒鱸槎頭雪朱
橘秋嘗屋角霜雨雨風風歸未得空勞飛夢繞
滄浪

晚行南垞懷陳文度

徐賁

離思滿荒煙行行只自憐吟成流水次望斷遠
鷗邊葉戀經寒樹星催欲夜天懷君無數里渾
似隔山川

懷袁子英

修崑山志
及韻書

易恒

汝易勤著述聞說又移居閉戶修山志開軒寫
韻書跡踈苔徑屐酒間雨牕蔬故舊凋零盡都
成一夢如

懷馬公振

與子同門友睽離久索居干戈春辟地燈火夜
觀書不厭魚鰕侶寧辭筍蕨蔬白頭老兄弟空
憶少年如

懷盧公武

殷奎

鹿城茅屋好風清千首文章萬古情江外暮雲
寒不動池頭春草夜仍生圖經筆削權衡見篆
籀風流劔戟鳴少小羨君爲古學而今高處到
姬羸

春日懷陳孝廉則

高啓

徂春易爲感復此棲孤寂鶯啼遠林雨悵望鄉
園隔客舍換衣晨僧齋聽鍾夕知君思正紛雜
英共如積

懷舊游寄顧玉山秦文仲陸良貴

釋來復

不到東滄十五年草堂梧竹故依然丹經只許
山人讀璞稿多因海客傳瓊樹着花明似雪金
壺盛酒美如泉從游公子皆豪傑長醉春風玳
瑁筵

喜欣上人歸山復思賢亭

項隲

上方欲訪題詩處西隱先尋結社緣洗樹雲通
林下路開窓山礙屋頭天舊遊零落晨星列勝
景追思劫火年今喜汝歸相慰藉小亭且復傍

思賢

聞呂敬夫移家五首

郭翼

憶汝秋來信使稀移家未覩是耶非月星繞樹
烏三匝風雨橫江鴈獨飛豈爲故人居赤甲還
從野老款荆扉東西擾擾皆爲客琴劍空慚坐
不歸

詹尹何勞更決疑衡門之下可棲遲竹從少府
韋家覓樹向果園坊裏移翡翠小堂巢窄窄鷗
鷖近渚檻垂垂主人一任懸徐榻更擬風流醉

習池

卜築應同野老居家貧猶有五車書從人更買
青田鶴入饌頻供丙穴魚謝眺能詩多警策嵇
康嬾性且麤踈江頭樹裏晴雲出日日看山候
小車

餘暑醉人猶困酒秋風秋雨下朝朝頗聞蔣詡
開三徑未識將軍第五橋月裏芙蓉催放艇天
頭鸞鶴待鳴簫海鄉應訝文星聚莫以尋常折
簡招

雨映清秋解鬱陶無端舒嘯倚東臯終懷楚國
屠羊肆已媿江州食犬牢五夜新涼吹枕几十
年舊夢落波濤老來亦慕歸畊好田屋芄芄黍
豆高

至正庚寅十月八日吳水西袁子英集余
寓有懷玉山匡山雲臺以端字爲韻

良琦

蘭若清溪曲苔蹊宿雨乾閉門書自展扣竹客
相看蓮社姑容酒松房可挂冠風流成雅會慷
慨失幽歡日落江聲急山空玉氣寒桃源人已
去柳逕菊初殘簪盍賓朋集田收秫米寬鄭莊

元好客陶令獨辭官詩憶迂辛好才追短李難
交游敦道義出處共盤桓昨者山行樂連朝興
未闌孫登嘯絕響靈運屐寧刊眺遠忻情豁臨
深怯股酸石竒翔鳳舞池碧老蛟蟠曲磴輿頻
憇蒼崖句欲刊披煙行磳确拂雪斲巔岼巖橘
黃金俎畦菘綠在盤空迂長者轍真具腐儒餐
聚合驚雲散睽離見月團鹿鳴還自詠流水不
成彈鴻鴈啼荒浦鳧鷗落暮灘冲襟聊一寫搔
首睇雲端

四君詠

并序

秦約

約日坐芝秀軒所相愛厚者廬君伯
融袁君子英陸君良貴每過必談仲
瑛園池亭館之勝山木水竹之美文
章翰墨相與藻績者則有鐵崖僊人
匡廬逸人今年春敬初歸自京師即
留玉山所敬初迺僕之深於氣類者
適見近製亦烏得而不動情也哉又
聞欲過江上竊自忻喜蓋友朋契濶
苟非晤集曷能爲之傾倒也謹賦詩

四首以懷四君且寓繾綣之意云耳
時至正庚寅正月十有八日也

楊廉夫

昔年射策龍墀日曲宴瓊林識聖賢天樂流音
琪樹杪星文垂彩喬雲間長楊五柞曾誇賦駟
馬成都復見還東觀老人行奏對三朝國史待
重刪

陳敬初

青青蘭芷照春袍春雨流肪滿綠臯秦國總傳
歌駟鐵浚郊無復賦干旄神魚衝岸江濤起威

鳳巢林海日高何似桐花花樹下玉罌翠杓汎
香醪

玉山人

柳塘飛閣畫橋低蒞石聽鶯淑景移不但鄭莊
偏好客也輸顧况最能詩采鉛日出辛夷塢洗
玉春明菡萏池多少東華冠珮者相逢都說虎
頭癡

于彥成

丹閣繡楹凌紫■琅玕芝草延清芬寶冠正憶
匡廬老玉文曾受華陽君笙鏞夜奏三珠樹鸞

新詩十八
鵠晨朝五色雲山中僊氣渾如蓋不緣高致遠
人羣

秋夜獨坐有懷玉山徵君

郊九成

庭樹葉初落鵲飛驚早秋玉繩猶未轉星漢忽
同流楊柳離亭思芙蓉別浦愁美人別煙渚滄
海信悠悠

秋懷奉寄仲瑛

陳基

江上秋陰十日多思君不見奈愁何風高澤國

來鴻鴈雨入汀洲落芰荷公子文章裁瑞錦佳
人衣袖剪輕羅畫船亦欲溪頭去聽唱花間緩
緩歌

婁東述懷寄上

邾經

寂寞婁東寺經過歲暮時後凋霜栢古亂點石
苔滋方外尊吾友龍門得老琦十年今幾遇早
歲故相知震澤三江入虹橋五色垂水西春酒
熟花下晚尊移聯句應題竹留餐更折葵那知
俱是客各以業爲師蓮社招呼費茆堂出處卑

也馳支遁馬而向習家池何物譏臣朔如人舞
恠達遂令兄弟急豈但友生疑落落情偏好悠
悠事莫期參商天上路萍梗海之涯嚮憶身猶
白前修道不緇君攀獅子座我把桂花枝吳子
非無學周胥亦有爲龍泉終再合豹管未容窺
泥滑雙扶屐燈明共奕碁咲言方款合交誼更
堅持好客囊羞澁捐人佩陸離初筵俄列豆屢
舞竟揚觶醉揖都輕別醒吟每重思優哉聊復
爾舍此欲何之伐木鳴幽鳥械笥寄阿誰玉山
投美璞珠水照摩尼爲說饒清事從游盡白眉

載觀名勝集多是故人詩自咲如張翰何煩識
項斯江帆風去逆林館雨留遲紫研玄香潤紋
牕斐几宜翔鸞開粉帟直髮引烏絲燕坐書成
癖窮探字識竒雄文毛穎傳小隸武梁祠韓柳
文章在雲龍上下隨兩家才並立千喙語難追
小子真狂簡前賢詎點嗤百金寧取直三絕且
聞癡漫與非神品居然奉令儀異時傾孔蓋八
字讀曹碑回首高飛隼行歌倒接離剡溪歸盡
興泌水樂忘饑野閣延疏廣韋編拾散遺儒冠
傲軒冕農耒力畬菑明月懷人遠長林鼓瑟悲

平常要久契，翻覆訝羣兒。顛把平生意，毋求小有疵。矢心同白水，披腹獻丹墀。把袂寒潮上，還家夜雪吹。上人逢顧愷，馮謝拙言詞。

懷玉山一首書珠簾氏便面

楊維禎

五月江聲入閣寒，故人西望倚闌干。珠簾新卷西山雨，第一峯前獨自看。

奉懷玉山

陸良貴

馬鞍山色兩峯尖，時送飛雲落畫欄。金鵲焚香

煙嫋嫋，銀鵝舞隊月纖纖。語調鸚鵡花連屋，影拂鳩鵲水動簾。綠想清游共于鵠，定多詞賦照牙籤。

秋官孫郎中謫戍鐵嶺有感而作

張泰

昔聞黃金多，坐見悔吝生。胡爲當此際，儉者禍亦嬰。署郎崑陽秀，早登科第名。玉壺置秋臺，剗煩刃離硯。神知拒暮謁，公事恒朝競。昨日重恩今，辰千里行。出門試荷戈，羸馬慘不鳴。妻子竟誰托，牽衣甫吞聲。脫釵解弊襦，勉爲饑渴

營江淮隔親舍日暮浮雲征玉關饒水雪鐵嶺
愁旆旌平生赤心肝肯替白日傾尚願此白日
長照渭與涇莫令黃河水滔滔不敢清

望秋亭有懷方尹

時方公以是年大水因
改春風亭為望秋故云

黃雲

亭改望秋秋已成穰穰禾稼甫田平寒棲雪樹
烏聲樂晴度雲天鴈陳橫刺水殘山陽動脉黃
童白首色回生一生治跡蕪文譽盈耳絃歌紹
武城

崑山雜詠卷第十八

崑山雜詠卷第十九

訓答

謝郊直秘校見訪

王安石

誤有聲名只自慚煩君跋馬過茅檐已知原憲
貧非病更喜莊周智養恬世事何時逢坦蕩人
情隨分就猜嫌誰能胷臆無塵滓使我相從久
未厭

答陳則見寄

高啓

何由慰遠思獨詠寄來詩
行路方難日清秋欲
盡時江多驚鴈火樹少
宿烏枝早晚如相見應
憐有鬢絲

次韻顧玉山見寄

袁華

草堂東郭帶煙蘿門外高軒客
屢過鄭國上卿知叔向新豐
逆旅薦常何柳迷官道鶯遷木
花暎春江水動波已許芝雲分
半席嘉時行樂醉
時歌

次韻答秦文仲

校文東觀繼前賢歸隱蕭齋日
草玄汲冢周書仇螽簡穀城黃
石授韋編怒撞玉斗鴻門宴淚
落金銅漢苑僊覽古懷今莫惆
悵還聽稷下衍
談天

玉山以詩見招用韻奉答

楊維禎

君泛脂江我泛婁沙棠小艇木
蘭舟醉吟鐵笛珠簾底端爲風
流刺史留
滄樓詩招蕭史鳳蓮艇或踏琴
高魚卷盡芙蓉
秋萬頃瀛洲信有玉人居

奉謝儂屋

玉山長者有高義，乞與山人儂屋金。駟馬一時皆上客，青娥三日有遺音。西山湧海當秋後，南斗流江入夜深。更報大茆張外史，興來須抱小雷琴。

大癡仙四和余籠字韻，自謂效鐵仙豔體。余首作，蓋未豔也。再依韻，用義山無題補豔體，且馳寄果育老人，腸胃有五色繡文者也。必不效癡仙菜肚子句。一啖蕪東玉山主客，自當爭一籌耳。

千枝燭樹玉青葱，綠紗照人江霧空。銀甲擘絲斜鴈柱，熏花撲被熟鴛籠。僊人掌重初承露，燕子腰輕欲受風。閒寫惱公詩已就，花房自擣守宮紅。

漏轉西壺酒轉東，金盤一筋萬錢空。犀株冷射琉璃柵，繡沓晴烘翡翠籠。仗簇銀駘沙路雨，信傳青鳥玉樓風。白櫻桃下芙蓉隊，中有雙花一蒂紅。

和顧子達見寄

郭翼

江上去年來避寇無家歸路轉淒迷桃花柳絮
當三月瘴雨蠻煙似五溪直見荒臺麋鹿走可
憐無樹鳳凰棲讀書支子橋邊宅瓦礫傷心暗
蒺藜

君住同丘似同谷閒身應是咲官忙梅花有興
吟東閣萱草無憂樹北堂漫省觀魚莊叟樂誰
憐歌鳳接輿狂相看馬困鹽車日何處悲鳴覓
九方

次所和竹所詩奉東玉山公望時年八十有三

黃公望公望字子久號大痴本常熟人陸神童之弟出繼永嘉黃氏黃

年九十始得之曰黃公望子久矣因
而名字焉性聰敏博極羣書於他伎
能無不通曉補浙西憲掾以忤權豪
棄去黃冠野服往來三吳開三教堂
於蘇之文德橋三教中人多執弟子
禮晚愛杭之笕箕泉結菴其上將為
終老計已而歸富春年八十六而終
公望善畫山水初師董源巨然後稍
變其法自成一家所著馬
山水訣至今人多放之

花檻香來風入座雕籠影轉月穿櫺鈎軒平野
連天碧排闥遙山隔水青

次韻荅謝玉山

鄭元祐

扁舟不亂白鷗羣又復移家入水雲載酒可無

人問字揮毫故有客書裙荒涼漢室銅盤淚剝
落周宣石鼓文猶藉顧循能慰藉江湖冷落見
番君

完顏巾歌

完顏金國人姓完顏與其部三
十二姓皆封金源郡金人之常
服四帶巾盤領衣烏皮靴其束帶曰
吐鵲玉為上巾之制以皂羅若紗為
之上結方頂折垂于後頂之下際兩
角各綴方羅徑二寸許方羅之下各
附帶長六七寸當橫額之上或為一
縮緞積貴顯者於方頂循十字縫飾
以珠其中必貫以大者謂之頂珠帶
旁各絡珠結綬長半帶垂之其衣多
白其從春秋山之服則多鵲捕鵲雜花
卉之飾從秋山之服則以熊鹿山林
為文其長中鵲
取便于騎也

袁華

完顏巾金粟道人所製寄鐵崖先生
先生賦長歌以謝率余同作

混同江流長白東完顏虎踞金源雄身如長松
馬如阜蹴踏黃龍城闕空鴛鴦灤上駕鵝雪春
水秋山事遊獵黃河清後聖人生一代表衣冠煙
霧滅瑞玉龍環四帶巾柘袍吐鵲裝麒麟錦房
芍藥大於斗驊騮坐擁真人傳自中原文獻
家全勝白氎小烏紗金粟道人鬢已秃挾以雙
環歸鐵崖鐵崖先生貌如玉繡縷盤花簇朱襖

鷓鴣小管沸箏琶春流銀甕葡萄綠日日倒載
 高陽池落花飄搖風滿衣九峯女兒拍手笑月
 中踏歌歌大堤先生醉筆蛟龍走報以長歌意
 殊厚脫巾花底一掀髯笑倩柳枝來漉酒按金

京路即海古之地金之舊土國言金曰按出虎以按出虎水源於此故名
金源建國之號蓋取諸此其山有長
白青嶺馬紀嶺完都魯水有按出虎
水混同江來流河宋瓦江鴨子河鴛
鴛灤一名昂吉灤隸裂遠金太祖軍
寧江駐高阜撒改仰見太祖體如喬
松所乘馬如岡阜太祖亦視撒改人
馬異常喜曰此吉兆也即舉酒酌之
曰異日成功當識此地衛紹王大安
元年徐沛界黃河清五百餘里幾二
年宣宗貞祐二年黃河自陝州界至

衛州八柳樹
清十餘日

白紙扇歌

呂誠

聞次安惠紙箑因賦此以贈之

我昔舟泊西江湄椎冰看擣萬楮皮江神相顧
 色慘愴波工自詫手不龜龜當作龜龜即瘴字
龜手之藥 懷金問價雲滿篋霜紈失素無晶輝
又支韻 廿年歸來存百一製成團扇真絕竒洪爐百鍊
 太古雪紫篔三尺盤屈鐵銀潢影射秋鑑光玉
 缸冷貫青天月昏目摩挲驚老醜連搖清風生

腋肘高堂晝把蠅蚋空魑魅潛藏飛電走豈不
聞箠姥不識王右軍茂弘曾障元規塵謝公高
風固足尚班女篋笥空悲呻烏飛兔擲急於箭
商飈奄忽號枯林嗚呼盛衰天地無古今炎涼
不易君子心

寄謝諶西堂惠紙

雲璽羅紋幸見投烏皮几上雪凝眸懷人端爲
雙魚信作賦空慚五鳳樓
翠峯西下連吳會雪浪東來入海門曾次不留
元字脚金香爐下鐵昆侖

謝惠則明秋菱次韻

筠籠遙致百冰丸入口先驚熨齒寒柔指不辭
連蒂摘弱肌終免抱枝乾甘芳粹矣斯爲美頭
角嶄然未可干應爲文園消渴甚好懷時復寄
詩壇

謝惠菜

江鄉正月尾菜臺味勝肉莖同牛乳腴葉映翠
釵綠每辱隣家贈頗慰老夫腹囊中留百錢一
日買一束

荅寄筍蔬

張雨

遠寄玉山篇來自故人廬竹萌且柔弱荻筍亦
豐腴薑醯助芳辛濁醪爲前驅猪肝恐累人我
亦仲叔徒念此風雨中江外致嘉蔬緘詩苔幽
意老饕良可吁

謝黃禮侍惠石屏

黃雲

春卿石屏三惠及失喜一笑多髯掀石從人琢
肖天秀妙絕一一難具論前山後山皆晦黑條
忽遠近無山村飛龍出峽捲霧雨恐是海立波

濤奔得非巖洞隱日月文章彪炳虎豹蹲昔人
畫裏寫生意石上乃有畫意存看石成畫照晴
色長帶冷濕煙霏痕化工運神莫可測元氣出
入無窮門太素以來出古色幽玄不可探且捫
峯頭雲氣白於雪鷄犬何處桃花源開屏卧遊
謀隱處結茅堪依蒼樹根窪尊飲水繙紆竹紫
翠萬狀娛朝昏我知春卿別有意罔俾傳玩到
子孫憐我窮愁久蟠鬱遣發豪竒期弗諼
謝方尹思道惠炭

雲也強項棄冷官簡編陳斷忍凍看平生堅立

古風節奚啻岱華峯嶺岼紅梅看花方細詠我
侯惠炭當冬殘筠篔皆實負者至拜嘉頃使心
平寬貧無隣僧乞米送朱門洞開亦懶干揚吳
鄧侯屢辱貺厚意不報歌伐檀侯心憂民勞撫
字疏上天闕輸心丹 帝俞疏言拯焚溺破啼
為笑咸騰歡一時餘惠荷波及舒寫老抱陳騷
壇東溟大觀天放逸千里飛雪風鵬搏萬言倚
馬何敢望僅洗郊島之瘦寒東風頃刻回造化
忽有春色生毫端颯颯乎而頌嘉政蒼厓鑿磨
垂不刊

謝惠茉莉

張和

和字節之崑山人正統四年進士
廷對稱旨將賜狀元及第以目

疾乃置第二甲第一人授南京刑部
主事累遷至浙江按察副使君性聰
敏過目成誦為詩歌有奇名對客伸
筆能頃刻千百言尤以道義自高人
多憚服之所
著有篠菴集

緇塵擁馬汗霑裳下馬欣然覽異芳
踈蒨亂叢千點雪好風清散一簾香
漢臯遊女留遺佩姑射僊人試曉粧
珎惠到前何以報短章遥寄荅來章

崑山雜詠卷第十九

崑山雜詠卷第二十

閑適

讀邈上人翠微集

蓋嶼嶼銅臺人宋政和中為邑令

聖宋吟哦祇九僧詩成往往比陽春翠微閣上
今朝見格老辭清又一人

鄭億年億年字長卿

幾年祠館樂安閒詩筆無聞老思慳謾把清篇
遮病眼每逢妙語解愁顏定知道行超塵外不
使才名落世間從此叢林推絕唱未應後學便

相班

喜樂功成招范至能入詩社

馬先覺

燕國將軍善主盟新封詩將一軍驚范家老子
登壇後鼓出曾中十萬兵

和馬少伊韻

范成大

氣壓伊吾一劍盟風生銅柱百蠻驚君家自有
堂堂陣我欲周旋恐曳兵

次韻唐致遠雨後喜涼

老陽作氣再三鼓衰竭之餘不支雨舉旗拔幟
掃跡空一點新涼破殘暑飛蚊薨薨已無寄蜻
蜓翅淨摩天嬉竹牕日暮轉蕭瑟喜有促織鳴
聲悲

次韻鄭逢辰直閣遷新居

趙彥端

早向承明倦直廬蕭然林下十年書便名盤谷
雖惡可閑賦斜川豈不如山擁北牕涼雨後月
生南浦夜潮餘江湖必有從公者風際拏音儻
是歟

生當帶索守林廬不合輕拋種樹書
賀燕得公真自樂敝貂將我敬何如
殊鄉更覺鄰為貴晚歲深期獨有餘
上下牀間相去幾未知夢覺孰非歟

買鄰賢於買宅

次鄭大資競渡詩韻

蓋諒

諒字明益

昔年冶遊浚都城溶溶春水漲金明
龍舟鱗次鼓蘭棹勝日講武風波平
沸地咲歌混簫篴轟天金鼓驚鷺鷥
當年冠蓋盡英游飛鞚聯翩迅翼翼
只今潛盤向荒陂疇曩偉觀那再期
熙熙

王化及遠近春來勝事還相隨
十百分朋同川濟咸欲得臬無異意
屈原死向千載餘今不敬弔翻成戲
敬弔賦就獨賈生可見君子異小人
公詩賈賦獨追傷忍以為戲向芳春
聽賜環在朝暮袞繡遄歸廟堂去
故先濯我塵土心琅琅哦公七字句

和葉季質以唐律兩篇見屬

陳長方

風流王右轄蕭散鄭丹丘
此事今難再如公可竝游
千篇詩價重十日酒船浮
聖主方東幸山

中莫滯留

元日奉呈項丈諸生

范成大

節物陰泐裏入情冷澹中百憂尋老大一咲屬
兒童雪意愁饑雀風聲入斷鴻新衣滿間巷終
日自西東

和范至能元日

項彥周

獻歲身留外思家恨滿中桃符襍厲鬼椒酒勤
僊童出謁憑羸馬題詩附去鴻青春應時節斗

柄夜搖東

幽居客至

馬少伊

吾愛吾廬似野人軒窓花草逐時新尋常俗客
經過少咫尺詩僊往復頻小摘園蔬微帶雨淺
筍甕蟻曲留春莫嫌供給全羞澁禮薄情濃却
是真

次馬得間幽居客至韻

樂備

吾道如君有幾人生憎輕薄白頭新林泉卜築

何妨靜詩酒尋盟不厭頻
小雨汀洲松浦霽斜
陽花草玉峯春芒屨竹杖
須乘興快取平生見
嬾真

次韻得間晚春即事

新晴初照屋山頭春欲歸
時事事幽詩著硬黃
容我掃酒拚大白共君浮
幸聞邊備初無警喜
見農功漸可鳩老去所期
如此耳人間底事更
關愁

樂菴李先生居南庄論張同
知不行挂冠
而歸賦二詩爲壽

高人擺羅鞵屬俗非小補
朝來漉酒中談咲易
珪組百年全始終一節照
今古回首聲利場車
輪正旁午

聞健即收身歸耕躬饁餉
詩中句堂堂牀頭春
盜盜寒花晚更香霜節老
益壯相對無俗情端
的義皇上

和鄭逢辰元宵韻

項寅賓

憶昔先皇賞露臺黿山半
影落蓬萊羣方欲識
龍顏喜雙闔時瞻雉扇開
十里僊香濛碧霧六

宮韶樂隱新雷神僊舊事渾如夢只有春風每
歲催

翠微山居詩二十首

冲邈

山水煎茶拗柳枝禪衣百結任風吹看經即在
明牕下得失榮枯總不知
任運騰騰作老顛何須論道復論禪莫將閒事
來相擾妨我長伸兩脚眠
閑來石上卧長松百衲袈裟破又縫今日不愁
明日飯生涯只在鉢盂中

臨溪草草結茅堂靜坐安禪一炷香不是息心
除妄想却緣無事可思量

老老山僧不下塔雙眉恰是雪分開世人若問
枯松樹我作沙彌親自栽

老來欲覓人間物須向紅塵問世人莫恠山僧
無掃帚都緣行處不生塵

幼入空門絕是非老來學道轉精微鉢中貧富
千家飯身上寒暄一衲衣

莫向人間定是非是非定得有何爲而今休去
便休去若欲了時無了時

朝見花開滿樹紅
暮觀落葉又還空
若將花比人間事
花與人間事不同

百計千般只爲身
不知身是冢中塵
莫欺白髮無言語
此是黃泉寄信人

早灰百念卧靈山
世路無心絕徃還
僧相祇宜林下看
不堪行到畫堂前

一池荷葉衣無盡
數樹松花食有餘
却被世人知去處
更移茆舍作深居

高人遠望石稜稜
疊嶂迴巖數十層
時人只識雲生處
不見松蘿巖下僧

辭君莫恠歸山早
爲憶松蘿對月宮
臺殿不將金鎖閉
來時自有白雲封

獨搖金錫出樊籠
便踏孤雲上碧峯
莫恠脚穿脫塵履
且圖行處不留蹤

三界無家誰最親
十方唯一空身
但隨雲水伴明月
到處名山是主人

茅簷靜對千山月
竹戶閑棲一片雲
莫送徃來名利客
塔前踏破綠苔紋

踏石穿山一老僧
白雲爲伴水爲朋
通宵只在洞中宿
月上青山便是燈

人生在世急如風昨夜今朝事不同不信但看
桃李樹花開能得幾時紅
僧家無事最幽閒近對青松遠對山詩句不曾
題落葉恐隨流水到人間
霜飛峭壁夜猿驚手把松枝叩月明知有石龕
僧入定朝來不作斷腸聲
任性隨緣一比丘一生無喜亦無憂白雲縱聽
飛來去但得青山在即休
爐中無火已多時早起惟將一衲披莫恠山僧
常冷澹夜深無處拾松枝

豈是栽松待茯苓且圖山色鎮長青他年行脚
不將去留與人間作畫屏

高高峯頂恣情田買斷清閒不用錢堪咲白雲
無定止被他風送出山前

次韻靜師仁叟山居

葉椿

生涯卜築翠微深門在煙蘿路幾尋竊果白猿
窺誦易棲松黃鶴聽調琴泉聲漱石丁東玉竹
影移風瑣碎金雨霽乘閒種瑤草和雲斲破古
松陰

雲磴苔深人到稀，養成踈懶類頑癡。半巖寒綠雨晴日滿地，落紅春盡時天籟。入松疑鼓瑟，怨禽啼月認吹篴。新篁遶舍綠陰合，靜對清流好賦詩。

樂菴初成

彦平歸老於此，在縣南圓明村。

李衡

老子平生百不足，菴成那管食無肉。終朝閉戶只讀書，四面開牕都見竹。投老菴居百事宜，早眠晏起不論時。更長睡足披衣坐，傾耳林間兩畫眉。

水雲居

吳仁傑

仁傑，邑人，嘗藏張旭草書酒德頌，周益公嘗為之跋，號斗南。

買得東鄰水一灣，開門正對馬鞍山。半茅半瓦屋不破，一詠一觴心自閒。牧笛聲中春雨散，釣絲風裏白鷗還。若無兒女平生累，不信桃源隔世間。

寓居全吳江上

姚申之

申之字崧，卿崑山人，隆興元年進士。

夜來得酒氣，增華興入丹梯。月姊家兩首新詩，一篇賦今年不負木樨花。

一雨通宵剪葑畦波稜生甲晚菘齊朝來赤脚
言語好醒酒杯羨有宿壘
幅巾蕭散一枝筇身在水雲千頃中抹野亂山
隨意碧裊林霜葉可憐紅
築成芋塹那憂餒爨到糜廩真箇窮飽坐西軒
觀物變一甌濃茗一林風

淮雲精舍言懷

張泰

幽獨卧禪林經年輟醉吟久知書可讀不耐病
相尋鳴鳥夜還曙落花春又深餘生憑藥餌更

敢問朝簪

未老已多病况逢春可悲一番寒食雨滿寺落
花時卜命餘著數謀生少藥資豈無歡樂地惟
悴欲何之

草履謝風塵幽居花木鄰息機甘在野多病不
宜春天地容孤子 朝廷恤小臣不妨蔬食外
湯藥健精神

營屢歸來病裏身上方清卧竹為鄰鍾殘別院
朝光澹花落環溪水色新雲掩空青長欲雨烏
啼煙綠似傷春此中情况渾牢落不媿山僧是

主人

訪翠微邈上人

郊僑

行客倦馳騁尋師到翠微相看無俗語一咲任
天機曲沼澹寒玉橫山鎖落暉情根枯未得愛
此幾忘歸

過慧聚寺訪凌峯閣賢上人

步入凌峯閣尋師師未歸凭闌寂無語唯見白
雲飛

夜宿東閣夢中遊晏甚適覺而梅影上牕

橫斜可愛口占一詩以紀云

袁華

梅花千樹草堂南花氣浮空若霧嵐姑射山中
春自好羅浮天上夢初酣蟠桃謾說瑤池宴僊
桂徒誇月窟探萬里僊遊才一瞬不知霜鬢雪
鬢鬢

訪偶氏簷簷軒時武孟制滿求仕

地有桃源

呂誠

舊草溪東十里餘小桃源上見郊居落紅石逕
和雲掃新綠瓜畦趁雨鉏池上此君宜對酒門

前長者屢迴車此中未讓商山老見說王褒有
薦書

洪武庚申九月廿七日訪鈕聲遠于太倉
城之正陽門造其室曰洞雲四簷竹樹
盆山清氣可掬因賦此詩并求其畫山

圖云

先生家住正陽門繞屋松聲日夜聞大藥總消
頭上雪小山長帶洞中雲已知濟物宜終慶况
是清時屬右文却咲吾詩與君畫海門風月儼
平分

暇日同栖白庚公過曦復初山房

陳植

雲房小如瓠團團坐虛白施食山鳥下焚香禪
定寂機鋒時脫穎詩律探玄蹟自慚五濁昏共
話三生石高蘿牽翠帷修竹照寒壁日未掩衡
門滿地殘紅積

訪沈士怡丹房

陳潛夫

繞屋丹光炫曉霞隔溪山色映鷗沙幾回談笑
停杯坐簾外春風落杏花

訪沈石田於廣慈僧寮

吳瑞

晚約周郎載短航遠尋東老過西塘問僧借墨
求題畫呼僕燒燈重舉觴野寺幸留高詠在青
山無奈去人忙悵然離合成俄頃星斗三更滿
地光

出北門訪呂進士回憇城隍廟西房

方豪

北門五月似秋涼乘興肩輿過草堂劉子墓前
楊柳密婁侯廟上井泉香綠秧黃麥風光好白

腕青裙婦女忙說起中原金革事番疑俗吏是
僊郎

閑居有感

張寰

寰字允清崑山人嘉靖初以進士累官通政司右叅議為人愷悌而

性尤不羈好遊名山每泛舟往返至數千里自方古之陶峴海內士大夫咸慕其高風云

清秋直北渺燕山魏闕遙瞻紫翠間北伐南征
猷自壯先憂後樂夢常關深山此日餘高枕當
路何人獨抗顏瀟灑乾坤吾欲老冥鴻何意羨
鷓班

閑適

周後叔

後叔字胤昌崑山人嘉靖間以進士歷官至金華太守為詩有

清思晚末尤嗜內典自號空空居士

青陽被芳甸王律調幽禽朱火旦夕流嬌歌忽已沉鏡顏委時變啾啾春華簪諒非金石姿胡為久滯淫朱絃有逸響欲奏無知音鷗鳥可與言相期白雲深

崑山雜詠卷第二十一

崑山雜詠卷第二十一

祖餞

送崑山孫少府

錢起

起字仲文長城人少穎敏能詩與郎士元齊名時語曰前有沈宋後

有錢郎大曆十才子起其一也嘗寓驛舍聞有人吟云曲終人不見江上

數峯青天寶十年就進士試湘靈鼓瑟詩遂以二句足之中首選授秘書

郎至翰林學士

狗祿近滄海乘流看碧霄誰知僊吏去宛與世塵遙遠帆背歸鳥孤舟低上潮懸知訟庭靜牕竹日蕭蕭

送知縣趙通直峴州人

冲邈

仁政三年有始終陽關聲徹去匆匆森嚴治已
冰霜比慈愛臨民父母同解印遠瞻京闕路挂
帆高颭楚天風不須更問崑山事已有歌謠達

帝聰時有芝草雙蓮之瑞諸司聞於朝

大門治邑歲年深公之叔祖名積昔嘗宰茲邑詒厥孫謀又

到今遺愛聯綿民結戀歸途迢遞柳垂陰九莖
芝草曾呈瑞竝蒂荷花已賞心或命朝廷求政
績何妨袖出野人吟

奉送自彊明府之官崑山

曾逮逮字仲躬以父幾致仕擢逮為浙西提刑以便養

吳中大縣數崑山心定庭空亦不難多事要將
無事治萬人須作一人看牀頭有易何妨讀琴
上無絃不用彈况是威名賢太守吏民誰敢半
言謾

又

曾逢逢字原伯

崑山壯哉縣葉子佳乎吏斯民要父母邂逅適
相值交游一星終我識君用意絃歌日寂寥正

恐未如志催科誰許拙巧則君所媿漢時見大
夫亦作三輔最

送崑山丞謝子瀟解官還朝

馬先覺

結交無慮三十年道同志合難其全傾蓋相歡
豈無有當面論心背不然晚知趣向動違俗閉
門避客魚淵潛屬聞貳令非常好才德遠過崔
藍田有懷欲吐難忍脚試剝雲霧看青天穆如
清風濯煩愠皎如明月墮我前論文未易探涯
涘講政一以民爲先老夫論說衆所廢公獨採

拾無棄捐承顏請益恨不數契合乃過金石堅
我方怙焉以爲命忍聞歌吹張離筵西郊日暖
玉生煙羨公此行若登僊何當化龍逐雲氣四
方上下相周旋含情握手不忍別敢效昔人禪
一言聖皇當宁方急賢願公袖草朝甘泉爲言
民瘼殊未痊徑須下詔寬緡錢

送衛狀元著作提舉淮東

樓鑰

鑰奉化人宋隆興初進士累官至

去後召爲參知政事卒謚宣獻爲人
質直和粹所薦多名士號玫瑰主人
有文集百餘卷

漢廷早已冠羣僊濶步瀛洲最少年切歎豈惟
年叵及人門才業總翹然

通泰牢盆巨海濱宅家專欲用儒臣淮南草木
生顏色又見龍頭第一人

羨君持節拜庭闈未老雙親着綵衣若遇蓋公

煩問信坐曹日念舊游稀

外府舊為勅局
衛乃蓋侍郎壻

屢從尊酒接從容叔寶風姿照座中他日相逢
年益老棊壇尚可角雌雄

賦得崑山送蔡廣文

袁華

之子駕言邁眷覽崑山顛鍾秀自前古著名由
昔賢昔賢去已遠茲山還巋然玉氣潤凝雨鶴
聲清聞天遙思解組日何如入洛年獻納有餘
暇為續崑山編

送崑山僕知州調嘉定

鴨綠漲江水鵝黃上柳絲二月婁東道燕燕初
來時婁有賢使君白晢美丰姿聯芳五枝桂不
覺竇家兒豈第民父母古希今罕有使君不我
留涉江采楊柳柳絲弱嫋嫋江水流瀰瀰柳衰
江水涸邦人思未已

分題得南武城送仲瑛之濠梁

南武城在婁水闔閭昔築候越兵樵李兵交竟
傷指夫差一戰雖復仇嘗膽毋忘會稽耻大夫
種至請行戒錮鏤卒賜忠臣死爭長潢池盟寧
知甬東徙南武城城已隳我來覽古仍賦詩棠
梨花落雨絲絲遊子西行何日歸悵望不見令
人悲

送盧公武應召北上

前朝圖史已全收詔起丘園重纂修用夏變夷
遵禮樂大書特筆法春秋金臺墨瀉朝揮灑銀

燭花消夜校讐進卷內廷承顧問鵠袍端立殿
西頭

送殷孝伯之咸陽教諭

聖代崇文化賢良起草萊鳳鳴揚谷日魚躍禹
門雷匠石無遺棄洪纖在剗裁咸陽秦赤縣博
士楚宏材話別嗟吾老橫經羨子才渡江淮浦
迴潁穎蔡河開紅樹迎官舫黃華映酒杯紀行
應俊逸覽古定徘徊遵陸由梁苑馮虛自吹臺
汴京城岿岿艮嶽石巍巍蹋月車鳴鐸嘶風騎
卷埃吳音儉父訝儒服虜人猜應爲青山住懸

知白石隕解鞍依近郭縱馬齧枯茭風急狂狐
嘯天高鴻鴈哀詩情秋共澹鄉夢曉同催喜見
烽煙息愁聽驛鼓迥虎牢悲戰骨緱嶺覓仙胎
岳仰嵩高峙河看砥柱栽山川猶鞏固風物亦
奇佻雞唱函關啓龍飛太華來碑亭矜漢好浴
殿弔唐災望極吳天末行窮渭水隈別家傾菊
釀到縣動葭灰多士爭先迓諸生獲後陪獻菹
芹實豆舍采酒崇壘五傳遺經在三餘萬卷該
尊王明大義抑伯黜渠魁寒榻臯比設朝盤首
藉堆樹萱思奉母援柱念提孩有弟能調饌何

郵不寄梅五陵還突兀八水自縈迴選勝節扶
手遐觀笏拄頰壞基留宿草斷礎長荒苔異域
多佳處茲遊實壯哉丈夫四海志肯使寸心摧
送高明府之崑山

高啓

茂苑行春罷携琴又向東潮聲數里外山色半
城中帆帶桃花雨衣翻柳葉風島夷聞善政爲
有船舶通

雲帆駕海圖詩送浙東副元帥鎖住公歸

鎮

元時歲漕東南稻米由海抵京邑至
正八年春海寇暴作勢張甚時鎖住

雜

公為浙東副元帥承命總兵由桃花口
入蛟門鼓行大洋中無幾微懼色先是
各道出師多為民病公所至民不知有
兵賊聞聚海島者皆遠徙他境凡三月
糧既卒事公廼由崑山劉家港取陸道
歸鎮飲酒于故人玉山草堂匡廬于立
既為之序而能言之
士復為歌詩以美之

顧瑛

聖神開天撫八方奄一覆載包洪荒五雲樓闕
天中央萬國王帛朝明光津梁可通海可航東
吳雲帆來稻梁咄哉餓賊空偃偃鯁蟻起舞狐
跳梁鎮東將軍龍虎章旌旗倒影搖扶桑指揮
鐵馬東浮洋洪濤海嶽相低昂天吳先驅萬鬼

行豐隆列缺從騰驤寧弧上射星垂芒劍光爍
水百恠藏鯨鯢遁逃日月明偃息干戈我冠裳
野人拜跪稱壽觴願公長年樂而康願公垂紳
居廟堂坐使 聖世登虞唐功名竹帛聲煌煌
赤松之子同翱翔

良琦

至正八年海冠作千艘萬艘聚島灤雲旗蔽天
駕刀槊人攀檣柁猿猱矍焚梁劫帥虜商舶槌
牛擊鼓日飲醞殺人齧肉列鼎鑊天地慘慘風
格格遂令東南日驚愕奏書聞天天不樂 帝

曰吾民罹毒蠱無乃拊字多苛虐致令頑愚肆
凶惡 聖德如天何庶博宥汝罪戾恩優渥從
其東歸樂耕鑿遵海而南地冥冥詔以官軍歲
巡掠桓桓帥府天東角元戎總兵閑將畧一朝
出巡兵踴躍千里威聲走風電祭神海廟靈肅
若拔劔黑水驅蛟鱷揮戈直今日倒却百恠羣
妖跡如削元戎颯爽頭未白霜月曾照烏臺栢
鎖住公兩為御史三持憲節
又掌符鉞以任方面故云致君承平海宇廓
丹青輝映麒麟閣歌詩願奏瞽叟樂 天子遇
之汲與霍

昂吉

大舶雲帆渡海時海濱父老望威儀舊時驄馬
烏臺客來把滄江破賊旗

漕府官曹事轉輸京城三月米如珠海風不起
波濤靜十日船行到直沽

秦約

瀚海浩無際澶漫八極連維天所設險肇自開
闢年於穆世 皇帝輔弼俱才賢經邦念儲待
漕粟東吳船烝嘗備七廟戎役俱三邊 列聖
相授受王道庶不偏八年建卯月盜賊起聯翩

剽掠縱烽火殺戮奮戈鋌紫垣爲之驚章奏
九重天廼剖銅虎符出師蕩腥羶屯兵駐山徼
係虜來江壩 聖心貴救寧宥過許自悛所期
在復業畊鑿相安然桓桓帥閫臣節制崇威權
歲定爲典常巡行遍山川舉旗位正正伐鼓聲
淵淵王靈醜類匿犒樂凱歌還顧瞻北斗星錯
落三台躔帆檣聚勾吳旬日達幽燕徐看驛騎
馳無復羽書傳江花照裘帽江柳拂鞍韉承恩
殊命重許國清忠全行矣近龍光論功丹宸前
送秦文仲歸崇明拜祠墓詩 有序

袁華

淮海秦君德鄉教授鄉里垂四十年歿
而門人私謚孝友先生其行述見楊鐵
崖所爲墓銘崇明桑梓里也至正庚子
高郵張君某同知州事始白於有司列
祀校宮之先賢祠以天賜堂主李君配
焉明年春正月其子約將歸拜祠下并
展三世松楸汝陽袁華追餞於婁之上
而贈君詩詩曰

維秦氏先裔本顓帝玄鳥誕祥爰暨大費湯湯

新詩七
洪水佐禹平治賜姓曰羸是爲栢繫下逮非子
主馬汧渭厥馬蕃息賞延于世胙之土曰錫以
爵位自岐徂豐奄有其地以國命氏子孫蹶蹶
冉相非商從學洙泗卒業聖門身通六藝三輔
萬石漢稱循吏曰綿曰族曰華曰系或棲巖穴
或推孝義文鳴淮海肇自觀始疏泝鹽城丁宋
之季南遷海隅相宅天賜懿自山父威儀棣棣
玉立長身清廟茂器授經于方力求源委朝斯
夕斯黽勉弗替貢於通州詩冠多士粵有仲子
才德粹美肥遯居貞行端學邃蔚彼鳳麟爲邦

家瑞講道鄉里垂四十載一裘一葛不事華靡
高爵榮名視若敝屣沉潜理域仁經義緯性命
道德經史傳記孜孜討論由內及外立言垂憲
先正是嗣後生小子爲所矜式歿有門人孝友
表謚崇川之陽木拱墓隧揭示素履有隆斯碣
偉哉張君恂恂愷悌以仁教養以德拊字下車
省俗振舉淹滯表里旌賢風化所係嗚呼先生
匪爵而貴上陳道統乃白有司翼翼新祠翬映
泮水約承家學繼志述事兢兢業業罔敢荒肆
春雨旣濡區萌叢萃顧瞻桑梓油然孝思駕言

新詩七
一
遄歸乘桴海澨鱷波底平雲颿宵濟展墓拜祠
聿修厥祭何以將之旨酒肥彘言言高門列戟
周衛七貴五侯充車結駟不學無術崇殖貨利
未及百年子孫皂隸聞先生之風胡不少媿滄
溟滔滔奔流東駛有如秦氏世澤罔既於千萬
年祀事不墜我作歌詩昭示來裔

匡山歌送恢復初上人

有美人兮思匡山歲云暮兮道險巇江空積雪
濤波若山駭慘慄兮凋朱顏邈芙蓉于五老兮
悵飛瀑之潺湲顛崖絕谷以晻藹方翼曾霄而

高舉如翥鳳而騫鸞長松幽蘭芊綿野芳鳥道
百折上捫翼軫不得窮躋攀鶴夜怨而寡侶遲
夫君兮未還山川搖落兮老冉冉而懷土歌匡
山兮送將歸望孤雲於極浦嗟昔人兮既遠訪
遺踪而覽古社結蓮以植花林賣杏而守虎驅
飛錫兮踰險阻雲爲扉兮月爲戶攜匡仙兮招
應真飯松花兮飲石乳展丹屏之九疊泝銀河
之三梁閱瓊經於石室採金芝於珠房霞氣朝
潤天光夜明養貞素於恬憺兮聊逍遙以徜徉
慨鳴鳳之不至胡衆鳥之高翔騶虞弗仁駑駘

以良樹樗折桂用狼牧羊彼方以蹶躄之爲潔
廉兮又奚慕乎夷齊採薇於首陽賦歸來兮彭
澤懷高士兮南昌清風至節照今古吾將尚友
于斯人兮歌濯纓于滄浪瞻白雲兮思君何山
高而水長

送葉吏侍先生西行邊

張泰

德望文聲月窟東兩朝嘉會識孤忠天教今代
有韓范廟筭西邊無犬戎鄉里衣冠崇一老軋
坤情事先諸公大車金鉉收公去白首無慚片

王峯

送崑山戴伯誠

除書新拜五雲間淮月江風擊掌還轉望槎邊
星遠漢景純墳上水浮山三江酒伴揮金會片
玉花亭解帶攀簇錦畫榮能自致似君青鬢不
虛斑

送吳考功德徵

吳寬

溽暑宜多雨南行又見君開尊臨積水挂席帶
踈雲片玉崑山出清風建業分鄉邦爲別意投

贈媿無文

駟馬橋送管方伯儒珍

方豪

此時倪宗正知太倉過與方同作此詩

吳有橋蜀人名

方跨婁水接崑城

倪崑城管老

童時遊少年過此曾留盟方今日車馬榮道傍

嘖嘖庸夫驚倪庸夫驚回戒其家遺子何須金

滿籬方咸曰今老即昨童今朝車馬誰能同控

制楚服一面崇倪楚人歌舞迎春風干戈連年

田野空白骨如麻落劍鋒天為蒼生借我公方

封事早夜達聖聰仁而不弛威而有容撫綏

掃蕩行天工

倪

野狼授首刃不紅煙篆雨笠春

郊農

天子曰惟汝之功

方

豐碑高比衡嶽峯

洞庭走其下以濯以磨勿為塵土封他年卿相

歸倪

此橋爭光輝光輝不與相如比邦家之光

樂只君子

送楊玄隱還崑

楊子器

僊珮珊珊下九天歸尋洞府舊桃源青牛初駕

天將曙白鶴高飛日正暄足跨蓬瀛三萬里口

談道德五千言拜章先見明春榜還報崑山出

狀元楊道官有夢兆狀元顧鼎臣中

林器

林文淵

崑山雜詠卷第二十一

周可順寫

唐尹刻

